

Pengurusan kewangan peribadi jadikan kursus wajib

Dari muka 1

Timbalan Dekan (Pengajian Siswazah dan Jaringan Industri & Masyarakat), Fakulti Ekologi Manusia, Universiti Putra Malaysia (UPM), Prof Madya Dr Mohamad Fazli Sabri, berkata pendekatan positif serta mesra pengguna adalah antara kaedah yang boleh digunakan khususnya bagi menarik minat golongan culas tegar menyelesaikan pembiayaan pendidikan mereka.

Pakar kewangan pengguna itu berkata, usaha berkenaan penting bagi mengurangkan peratusan peminjam culas tegar seperti melalui pemberian diskaun, ganjaran dan aplikasi dompet elektronik (e-dompet), boost.

“Terdapat banyak inisiatif dilaksana PTPTN bagi membantu peminjam menyelesaikan pembiayaan pinjaman mereka hinggalah penyenggaraan peminjam dalam Sistem Maklumat Rujukan Kredit Berpusat (CCRIS), justeru perlu ada pendekatan positif khususnya untuk menarik minat peminjam culas tegar ini.

“Bagi saya alternatif mesra peminjam seperti kaedah boost dan pemberian diskaun perlu diperbanyakkan lagi kerana dapat membantu peminjam membuat bayaran balik selain menggunakan saluran sedia ada ketika ini,”

katanya ketika ditemui di UPM, di sini, baru-baru ini.

Dr Mohamad Fazli juga mengakui persepsi, kurang kesedaran dan keprihatinan menyebabkan ada segelintir peminjam yang enggan melunaskan pinjaman mereka, namun percaya kerajaan pasti mempunyai perancangan tersendiri untuk menyelesaikan perkara ini.

Beliau berkata, badan bertanggungjawab juga perlu terus mempergiatkan lagi usaha mempromosi kepentingan menyelesaikan pinjaman pendidikan khususnya di media sosial.

“Pada pandangan saya, perlu ada pendekatan menyeronokkan dan sesuai untuk menarik minat peminjam culas tegar kerana mungkin mereka takut bila mendengar perkataan seperti CCRIS, setidak-tidaknya dapat mengubah status

peminjam culas tegar kepada culas.

“Dalam konteks ini, semua pihak perlu memainkan peranan masing-masing dan ibu bapa juga perlu merancang kewangan awal bagi tujuan pendidikan tinggi anak-anak seperti melalui Skim Simpanan Pendidikan Nasional (SSPN),” katanya.

Mengulas lebih lanjut, Dr Mohamad Fazli turut mencadangkan agar subjek Pengurusan Kewangan Peribadi dijadikan kursus wajib pada semua peringkat program di universiti.



*Prof Madya Dr Mohamad
Fazli Sabri*